

黎岳集 唐 李频

提要

黎岳集

提要

《黎岳集》一卷。唐李频撰。频，字德新，寿昌人，大中八年擢进士第，调秘书郎，累迁建州刺史。卒于官。州人思其德，立庙。黎山岁时享祀，颇着灵异。宋绍兴——庆元——嘉泰——开禧时，累加封爵。元亦列于祀典。频为姚合之壻，然其诗，别自为格，不类武功之派。唐书列于《文艺传》中。是编，本名《建州刺史集》，后人敬频之神，尊黎山，曰黎岳，集亦因之改名。初，罕传本。真德秀得本于三馆，欲刻未果。嘉熙三年，金华王埜始求得旧本，镌板。元元贞及后至元间，频裔孙邦材会同明永乐中河南师佑、正统中广州彭森，先后重刊者四，此本即正统刻也。凡诗一百九十五首，较全唐诗所载少八首，而《送刘山人归洞庭》一首卷中两见，惟起二句小异。又，《秋宿慈恩寺遂上人院》诗误作《送宋震先辈赴青州》，题与诗两不相应，殊不及席氏《唐百家诗》所刊完善。特以專集行世者，仅有此本，故仍其旧錄之。王士禛称诗人为神，未有若频之显著者。然频，诗自佳耳，其为神则政事之故，非文章之故固，未可相提并论也。

黎岳集

【湖口送友人】

中流欲暮见湘烟，苇岸无穷接楚田（一作天）。去鴈遠冲云梦泽（一作雪），离人独上洞庭船。风波尽日依山转，星汉通宵向水连。零落梅花过残腊，故园归（一作去）醉及（一作去又）新年。

【鄂州头陀寺上方】

高寺上方无不见，天涯行客思迢迢。西江帆过（一作挂）东风急，夏口城冲（一作衔）楚塞遥。沙渚渔归多湿网，桑林蚕后尽空条。感时叹物寻僧话，惟（一作谁）向禅心得寂寥。

【寄遠】

槐欲成阴分袂时，君期十日复金扉。槐今落叶已将尽，君向遠方犹未归。化石早曾闻节妇，沉湘何必独灵妃。须知此意同生死，不学他人空寄衣。

【题张司马別墅】

庭前树尽手中栽，先后花分几番开。巢鸟恋雏惊不起，野人思酒去还来。自抛官与青山近，谁讶（一作料）身为白发（一作日）催。门外寻常行乐处

，重重履迹在莓苔。

【长安即事】

长遇豪家不敢过，此身谁与取高科。故园久绝书来后，南国空看鴈去多。
中夜永怀听迭漏，先秋归梦涉层波。愁人白发自生早，我独少年能几何。

【汉上逢同年崔八】

去岁曾游帝里春，杏花开过各离秦。偶先托质逢知己，独未还家作旅人。
世上路岐何缭绕，空中光景自逡巡。一回相见一离别，能得几时年少身。

【五月一日，蒙替本官不得。随例入阙，感怀献送相公】

五月倾朝谒紫宸，一朝无分在清尘。含香已去星郎位，衣锦惟思婺女邻。
折狱也曾为俗吏，劝农元本是耕人。知将何事酬公道，只养生灵似养身。

【春闺怨】

红妆（一作粉）儿女（一作女儿）窗下羞，画眉夫婿陇西头。自怨愁容长
照镜，悔教征戍觅封侯。

【送边将】

防秋戎马恐来奔，诏发将军出鴈门。遥领短兵登陇首，独横长剑向河源。
悠扬落日黄云动，莽苍阴风白草翻。若纵干戈更深入，应闻收得到昆仑。

【太和公主还宫】

天骄发使犯边尘，汉将推功遂夺亲。离乱应无初去貌，死生难有却回身。
禁花半老曾攀树，宫女多非旧识人。重上凤楼追故事，几多愁思向青春。

【将赴黔州先寄本府中丞】

八月瞿塘倒底翻，孤舟上得已销魂。幕中职罢犹趋府，阙下官成未谢恩。
丹嶂耸空无过鸟，青林覆水有垂猿。感知肺腑终难说，从此辞归便扫门。

【和友人下第北游感怀】

圣代为儒可致身，谁知又别五陵春。青门独出空归鸟，紫陌相逢尽醉人。
江岛去寻垂钓远，塞山来见举头频。且须共漉边城酒，何必陶家有白纶。

【乐游原春望】

五陵佳气晚氛氲，霸业雄图势自分。秦地山河连楚塞，汉家宫殿入青云。
未央树色春中见，长乐钟声月下闻。无那杨花起愁思，满天飘落雪纷纷。

【黄雀行】

欲窃高仓集御河，翩翩疑渡畏秋波。朱宫晚树侵莺语，画阁香帘夺燕窠。
疎叶暗栖寒露重，空城饥噪暮烟多。谁令不解高飞去，破宅荒庭有网罗。

【长安寓居寄柏侍郎】

霜轻两鬓欲相侵，愁绪无端不可寻。秦女红妆空觅伴，郢郎白雪少知音。
长亭古木春先老，太华青烟晚更深。独向灞陵东北望，一封书寄万重心。

【春日思归】

春情不断若连环，一夕思归鬓欲斑。壮志未酬三尺剑，故乡空隔万重山。
音书断绝干戈后，亲友相逢梦寐间。却羡浮云与飞鸟，因风吹去又吹还。

【朔中即事】

闕门南北杂戎夷，草木秋来即出师。落日风沙长暝早，穷冬雨雪转春迟。
山头烽火孤明后，星外行人四绝时。自古边功何不立，汉家中外自相疑。

【感懷献门下相公】

谁云郎选不由诗，上相怜才积有时。却是龙钟到门晚，终非稽古致身迟。
谋将郡印归难遂，读着家书坐欲痴。日望南宫看列宿，迢迢婺女与乡比（一作邻毗）。

【赠长城庾将军】

初年三十拜将军，近代英雄独未闻。向国报恩心比石，辞天作镇气凌云。
逆风走马貂裘卷，望塞悬弧鴈阵分。定拥节麾從此去，安西大破土戎羣。

【浙东献郑大夫】

圣主东忧涨海滨，思移副相倚陶钧。楼台独坐江山月，舟楫先行泽国春。
遥想万家闲（一作开）户外，近闻羣盗窜诸邻。几时入去调元化，天下同为尧舜人。

【镜湖夜泊有懷（东晋太守马臻所筑）】

广水遥堤利物功，因思太守惠无穷。自从版筑兴农隙，长与耕耘致岁丰。
涨接星津流荡漾，宽浮云岫动虚空。想当战国开时有，范蠡扁舟祇此中。

【宣州献從叔大夫】

清时选地任贤明，從此观风辍尹京。日月天中辞洛邑，云山江上领宣城。
万家闾井俱安寝，千里农桑竟起耕。闻说圣朝同汉代，已愁征入拜公卿。

【贺同年翰林從叔舍人知制誥】

仙禁何人蹑近踪，孔门先选得真龙。别居云路抛三省，專掌天书在九重。
五色毫挥成涣汗，百寮班下独從容。芳年贵盛谁为比，郁郁青青岳顶松。

【吴门别主人】

早晚更看吴苑月，小斋长忆落西窓。不知明夜谁家见，应照离人隔楚江。

【自黔中归新安】

朝过春闕辞北阙，暮参戎幕向南巴。却将仙桂东归去，江月相随直至（一作到）家。

【奉和郑熏相公】

三四株松匝草亭，便成彭泽柳为名。遥（一作莲）峯隱去难辞阙，浣水朝回与出城。

【及第后还家过岷岭】

魏驮山前一朶（一作片）花，岭西更有几千家。石斑鱼鲊香冲鼻，浅水沙田饭遶牙。

【春日旅舍】

未识东西南北路，青春白日坐销难。如何一别故园后，五度花开五处看。

【过长江伤贾岛】

忽従一宦远流离，无罪无人子细知。到得长江闻杜宇，想君魂魄也相随。

【自遣】

永拟东归把钓丝，将行忽起半心疑。青云道是不平地，还有平人上得时。

【寄曹邴】

终南山是枕前云，禁鼓无因晓夜闻。朝客秋来不朝日，曲江西岸去寻君。

【述懷】

望月疑无得桂緣，春天又待到秋天。杏花开与槐花落，愁去愁来过几年。

【客洛酬刘驾】

浮世总应相送老，共君偏更远行多。此回不似前回别，听尽离歌逐棹歌。

【题钓台障子】

君家尽是我家山，严子前台枕古湾。却把钓竿终不可，几时入海得鱼还。

【题阳山顾炼师草堂】

若到当时上升处，长生何事后无人。前峯自去种松子，坐见将（一作年）来取茯神。

【闻金吾妓唱梁州】

闻君一曲古梁州，惊起黄云塞上愁。秦女树前花正发，北风吹落满城秋。

【游蜀回简友人】

别来十二月，去到漏天边。不是因逢闰，还应似（一作【是】、一作【须知已】）来年。

【赠泾州王侍御】

一旦天书下紫微，三年旌旆陇云飞。塞门无事春空到，边草青青战马肥。

【夏日（一作秋夜）宿秘书姚监宅】

贵宅多嘉树，先秋有好风（一作【高树密蒙蒙，开楼待晓风】）情闲离阙下，梦野在（一作到）山中。露色浮寒瓦，萤光堕暗丛。听吟丽句尽，河汉任西东（一作转虚空）。

【过嵩阴隱者】

当门看少室，倚杖复披衣。每日醒还醉，无人是与非。架书抽读乱，庭果摘尝稀。独有江南客，思家未得归。

【留别山家】

闭门不易求，半月在林邱。已与山水别，难为花木留。孤懷归静夜，遠会隔高秋。莫道无言去，冥心在重游。

【送人游吴】

楚田开雪后，草色与君看。积水浮春气，深山滞（一作带）雨寒。毗陵孤月出，建业一钟残。为把乡书去，因收别泪难。

【东渭桥晚眺】

秦地有吴洲，千檣渭曲头。人当返照立，水彻故乡流。落第春难过，穷途日易愁。谁知桥上思，万里在江楼。

【送延陵韦少府】

延陵称贵邑，季子有高踪。古迹传多代，仙山管几峯。微泉声小雨，异木色深冬。去毕三年秩，新诗篋不容。

【淮南送人归沧州】

风色忽西转，坐为千里分。高帆背楚落，寒日逆淮曛。断烧绿乔木，盘鵬隱片云。乡關百战地，归去始休军。

【夏日题盩厔友人书斋】

修竹齐高树，书斋竹树中。四时无夏气（一作日），三伏有秋风。黑处巢幽鸟，阴来叫候虫。牕西太白雪，万仞在遥空。

【寻山】

一径入双崖，初疑有几家。行穷人不见，坐久日空斜。石上生灵草，泉中落异花。终须结茅屋，向此学渔霞。

【送元遂上人归钱塘】

白衣游帝乡，已得事空王。却返湖山寺，高禅水月房。雨中过岳黑，秋后宿船凉。回顾秦人语，他生会别方。

【贻友人喻坦之】

從容心自切，饮水胜衔杯。共在山中长，相随阙下来。修身空有道，取士各无媒。不信升平代，终遗草泽才。

【送友人往振武】

风波遥见说，道路替君愁。碛夜星垂地，云明火上楼。征鸿辞塞雪，战马识边秋。不共将军语，何因有去留。

【赋得长城斑竹杖】

秦兴版筑时，剪伐不知谁。异代余根在，幽人得手持。细看生古意，闲倚动边思。莫作鸠形并，空将鹤髮期。

【送德清喻明府】

棹返霅溪云，仍参旧使君。州传多古迹，县记是新文。水栅横舟闭，湖田立木分。但如诗思苦，为政即超羣。

【送薛能少府任盩厔】

不才甘下第，君子蹇何重。相送昆明岸，同看太白峯。数瓢留顷刻，残照迫従容。好去烟霞县，仙人有旧踪。

【送许寿下第归东山】

吾君设礼闱，谁合学忘机。却是高人起，难为下第归。出關心縱野，避世事终稀。莫更令秋夕，相思望少微。

【冬夜酬范秘书】（一作【九衢春日酬范秘书】）

九衢行一匝，不敢入他门。累日无余（一作非无）事，通宵得至（一作尽）言。命嗟清世蹇，春觉闰冬暄。翻覆吟佳句，何酬国士恩。

【送陆肱尉江夏】

如何执简去，便作挂帆期。泽国三春早，江天落日迟。县人齐候处，洲鸟欲飞时。免褐方三十，青云岂白髭。

【汉上送人西归】

几作西归梦，因为怆别心（一作【此日看行意，令人动遠心】）。野衔天去尽，山夹（一作束）汉来深。迭浪翻残照，高帆引片阴。空留相赠句，（一作【惟应留别句】）毕我白头吟。

【蜀中逢友人】

自古有行役，谁人免别家。相欢犹陌上，一醉任天涯。积迭山藏蜀，潺湲水遶巴。他年复何处，共说海棠花。

【寄范评事】

行坐不相遗，辕门载笔时。雅知难更遇，旧分合长思。梦即重寻熟，书常转达迟。山斋终拟到，何日遂心期。

【南游过湘汉即事寄友人】

南去远驱逐，三湘五月行。巴山雪水下，楚泽火云生。向野聊中饮，乘凉探莫程。离懷不可说，已迫峡猿声。

【送许浑侍御赴润州】

家山近石头，遂意恣东游。祖席离乌府，归帆转蜃楼。阴氛出海散，落月向潮流。别有为霖日，孤云未自由。

【喜友人厉圖南及第】

相忧过已切，相贺似身荣。心达无前后，神交共死生。承家吾子事，登第世人情。未有通儒术，明时道不行。

【送友人下第归越】

归意随流水，江湖共在东。山阴何处去，草际片帆通。雨色春愁里，潮声晓梦中。虽为半年客，何（一作便）是往来鸿。

【寄友人】

一别一相见，须臾老此生。客衣寒后薄，愁思夜深清。诗近吟何句，髭新白几茎。路岐如昨日，来往梦分明。

【送友人下第归宛陵】

天涯长恋亲，阙下独伤春。拟住还求己，须归不为身。临岐仍犯雪，挂席始离尘。共泣东风别，同为沧海人。

【秋夜对月寄凤翔范书记】

月过（一作遇）秋霖后，光应夜夜清。一回相忆起，几度独吟行。河汉东西直，山川远近明。寸心遥往处，新有鴈来声。

【送孙明秀才往潘州访韦卿】

北鸟飞不到，北人今去游。天涯浮瘴水，岭外问潘州。草木春冬茂，猿猱日夜愁。定知迁客泪，应只对君流。

【八月十五夜对月】

阴盛此宵中，多为雨与风。坐无云雨至，看共雪霜同。抱湿离遥海，倾寒向迥空。年年不可值，还似命（一作道）难通。

【及第后归】

家临浙水傍，岸对买臣乡。縱棹随归鸟，乘潮向夕阳。苦吟身得雪，甘意鬓成霜。况此年犹少，酬知足自强。

【过巫峡】

拥棹向惊湍，巫峯直上看。削成從水底（一作地底），耸出在云端。暮雨晴时少（一作晴归少），啼猿渴下难。一闻神女去，风竹扫空坛。

【送友人往太原】

离亭聊把酒，此路彻边头。草白鴈来尽，时清人去游。汾河流晋地，塞雪满并州。别有相思夜，空（一作遥）看北斗愁（一作【明日相思起，萧条上北楼】）。

【旅懷】

万里共心论，徒言吾道存。奉亲无别业，谒帝有何门。水宿惊涛浦，山行落叶村。长安长梦去，欹枕即闻猿。

【送裴御史赴湖南】

开（一作闕）门鸟道中，飞传复乘骢。暮雪离秦甸，春云（一作雷）入楚宫。平芜天共阔，积水地多空。使府悬帆去（一作待），能消几日风。

【送姚郃先辈赴汝州辟】

行李事寒天，东来聘礼全。州当定鼎处，人去偃戈年。雨雪（一作风雨、一作雷雨）依嵩岳，桑麻接楚田。遥知清夜作，不是借戎篇。

【黔中酬同院韦判官】

平生同所为，相遇偶然迟。各着青袍后，无归白社期。江流来绝域，府地管诸夷。圣代都无事，従公且赋诗。

【和范秘书襄阳旧游】

听话扬帆兴，初従岷首还。高吟入白浪，遥看出青山。枯树（一作古木）猿啼爽，寒汀鹤步（一作立）闲。秋来关（一作南）去梦，几夜度商颜。

【秋夜山中思归寄友人】

萧条对秋色，相忆在云泉。木落病身起，潮平归思悬。凉钟山顶寺，暝火渡头船。此地非吾土，淹留又一年。

【自黔中东归旅次淮上】

行旅本同愁，黔吴复阻修。半年方中路，穷节到孤舟。夕霭垂阴野，晨光动积流。家山一夜梦，便是昔年游。

【江夏春感旧】

东风出海门，处处动林园。泽国雪霜少，沙汀花木繁。暖鱼依水浅，晴鴈入空翻。何处阳和力，生萍不驻根。

【詹州别李使君】（一作【眉山留献张端公】）

回首雪峯前，朱门心杳然。离人自呜咽，流水莫潺湲。毒草通蛮徼，秋林近漏天。一生从此去，五字有谁怜。

【送许棠及第归宣州】

高科终自致，志业信如神。待得逢公道，由来合贵身。秋归方觉好，旧梦始知真。更想青山宅，谁为后主人。

【黔中罢职将泛江东】

黔荒（一作中）初罢职，薄俸亦无残。举目乡关远，携家旅食难。野梅将雪竞，江月共沙寒。两鬓愁应白，何劳（一作劳心）把镜看。

【长安书事寄所知】

帝里本无名，端居有道情。睡魂春梦短（一作断），书兴晚牕明。老拟归何处，闲应过此生。江湖终一日，拜别便东行。

【酬姚覃】

不见又相招，何曾诉寂寥。醉眠春草长，吟坐夜灯销。泪堕思山切，身归转路遥。年年送别处，杨柳少垂条。

【春日鄜州赠裴居言】

虽将身佐幕，出入似闲居。草色长相待，山情信不疎。灯前春睡足，酒后

夜寒余。笔研时时近，终非署簿书。

【送于生入蜀】

家吴闻入蜀，道路颇乖离。一第何多难，都城可少知。江山非久适，命数未终奇。况又将冤抱，经春杜魄随。

【送许棠归泾县作尉】

青桂复青袍，一归荣一高。县人齐下拜，邑宰共分曹。遶郭看秧插，寻街听茧缲。封侯万里者，燕颌乃徒劳。

【友人话别】

论交虽不早，话别且相亲。除却栖禅客，谁非南陌人。半生都返性，终老拟安贫。愿入白云社，高眠自致身。

【山居】

欲出穷吾道，东西自未能。卷书（一作帘）惟对鹤，开画（一作卷）独留僧。落叶和云扫，秋山共月登。何年石上水，夜夜滴高层。

【寄范郎中】

藜杖山中出，吟诗独范家。相知徒海峽，寄食向京华。名宦成何报，清眸未縱賒。临邛梦来往，雨雪满褒斜。

【书懷】

宦途徒不问，身事觉无差。华发初生女，沧洲未有家。却闲思洞穴，终老旷桑麻。别访栖禅侣，相期语劫沙。

【越中行】

越国临沧海，芳洲复暮晴。湖通诸浦白，日隱乱峯明。野宿多无定，闲游免有情。天台闻不遠，终到石桥行。

【春日南游寄浙东许同年】

孤帆处处宿，不问是谁家。南国平芜遠，东风细雨斜。旅懷多寄酒，寒意欲留花。更想前途去，茫茫沧海涯。

【明州江亭夜别段秀才】

离亭向水开，时候复蒸梅。霹雳灯烛灭（一作烛灯灭），蒹葭风雨来。京關谁共语，海峽不同回。莫为莼鲈美，天涯滞尔才。

【临岐留别相知】

百岁竟何事，一身长遠游。行行将近老，处处不离愁。世路多相取，权门不自投。难为此时别，欲别愿人留。

【鄂渚湖上即事】

杜门聊自适，湖水在牕间。縱得沧江去，无过白日闲。多慵空好道，少贱蚤雕颜。独有东峯月，依依自往还。

【辞夏口崔尚书】

一饭仍难受，依仁况一年（一作 淹留已半年）。终期身可报，不拟骨空鏖。
城晚风高角，江春浪起船。同来（一作 曾同）栖止地，独去塞鸿前。

【秦（一作 春）原早望】

一忝乡书荐，长安未得回。年光逐渭水，春色上秦台。燕掠平芜去，人冲
细雨来。东风生故里，又过几花开。

【送友人之扬州】（一作【送友人游淮南】）

一别长安后，晨征便信鸡。河声入峡急，地势出关低。绿树丛垓下，青芜
阔楚西。路长知不恶，随处好诗题。

【过四皓庙】

东西南北人，高迹自相亲。天下已归汉，山中犹避秦。龙楼曾作客，鹤氅
不为臣。独有千年后，青青庙木春。

【陕下怀归】

故园何处，零落五湖东。日暮无来客，天寒有去鸿。大河冰彻塞，高岳
雪连空。独夜悬归思，迢迢永漏中。

【送徐处士归江南】

行行野云薄，寒气日通春。故国又芳草，沧江终白身。游归花落满，睡起
鸟啼新。莫惜闲书札，西来问旅人。

【鄜州留别王從事】

相识未十日，相知如十年。从来易离别，此去忽留连。路险行冲雨，山高
度隔天。终难清夜坐，更听说安边。

【长安书懷】

匹马西游日，从吴又转荆。风雷几夜坐，山水半年行。梦永秋灯灭，吟余
晓露明。良时不我与，白发向头盈。

【冬夜山中寻友（一作 寻僧）】

何人山雪夜，相访不相思（一作【夜山深雪后，月下独寻师】）。若得长
闲日，应无暂到时。叶寒雕欲尽，泉冻落还迟。即此天明去，重来未有期。

【送刘山人归洞庭】

君逐云山去，人间又绝踪（一作【去意无人会，惟应道是从】 一作【却
共归云去，高眠最上峯】）。半湖乘早月，中路入疎钟。秋尽草（一作户
）（原文阙）急，夜深山雨重。平生心未已，岂得更相从（一作【当时同隐者
，分得几株松】）。

【古意】

白马游何处，青楼日正长。凤箫抛旧曲，鸾镜懒新妆。玄鸟深巢静（一作

玄鸟空巢语），飞花入户香。虽非窈窕妇，锦字已成章。

【避暑】

当暑忆归林，陶家借柳阴。蝉徙初伏噪，客向晚凉吟。白日欺玄鬓，沧江负素心（二联同《后夏日整屋郊居寄姚少府》诗）。神仙傥有术，引我出幽岑。

【送吴秘书归杭州】

为客得徙容，官清料复重。海涯归有业，天目近何峯。是处通春棹，无村不夜舂。马卿夸贵达，还说返临邛。

【中秋对月】

秋分一夜停，阴魄最晶荧。好是生沧海，徐看历杳冥。层空疑洗色，万怪想潜形。他夕无相类，晨鸡不可听。

【八月上峡】

万里巴江水，秋来满峡流。乱山无陆路，行客在孤舟。汹汹滩声急，冥冥树色愁。免为三不吊，已白一生头。

【送狄明府赴九江】

字人修祖德，清白定闻传。匹马徙（一作离）秦去，孤帆入楚悬。關中寒食雨，湖上暑衣天。四考兼重请（一作重摄），相知住几年。

【陝下投姚谏议】

旧业在东鄙，西游徙楚荆。风雷几夜坐，山水半年行。梦永秋灯灭，吟孤晓露明。前心若不遂，有耻却归耕。

【關东逢薛能】

何处不相思，相逢还有时。交心如到老，会面未为迟。苦学緣明代，劳生欲白髭。唯君一度别，便似见无期。

【富春赠孙璐】

天柱与天目，曾栖絕顶房。青云求禄晚，白日坐家长。井气通潮信，牕风引海凉。平生诗称（一作稿）在，老达亦何妨。

【送友人游蜀】

东堂虽不捷，西去复何愁。蜀马知归路，巴山似旧游。星临剑阁动，花落锦江流。鼓吹青林下，时闻祭武侯。

【夏日整屋郊居寄姚少府】

古木有清阴，寒泉在下深。蝉徙初伏噪，客向晚凉吟。白日欺玄鬓，沧江负素心（二联与前避暑首同）。甚思中夜话，何路许相寻。

【送胡休处士湘江】

见说荆湘切，长愁有去时。江湖秋涉达，雷电（一作雷雨、一作风雨）夜

眠迟。旧业多归兴，空山尽老期。天寒一瓢酒，落日醉留谁（一作拟留谁）。

【峡州送清彻上人归浙西】（一作 【送清江上人归东林】）

风涛几千里，归路半乘舟。此地难相遇（一作别），何人更共游（一作留）。

坐经嵩顶夏，行值洛阳秋。到寺安禅夕，江云满石楼。

【送僧入天台】

一锡随缘赴，天台又去登。长亭旧别路，落日独行僧。夜烧山何处，秋帆浪几层。他时授巾拂，莫为老无能。

【回山后寄范鄮先辈】

高楼会月夜，北鴈向南分。留住经春雪，辞来见夏云。遥空江不极，绝顶日难曛。一与山僧坐，无因得议文。

【长安送友人东归】

白社思归处，青门见去人。乡遥茂苑树，路入广陵尘。海日潮浮晓，湖山雪带春。犹期来帝里，未是得闲人（一作身）。

【深秋过源宗上人房（一作方丈）】

到日值摇落，相留山舍空。微寒生夜半，积雨向秋终（此联同后《暮秋宿清源上人院》诗）。度讲多来鴈，经禅少候虫。方徒听话后，不省在愁中。

【秋日登山阁】

苍苍山阁晚，杳杳隙尘秋。偶上多时立，翻成尽日愁。草平连邑动，河满逐江流。下想穷边路，行人在陇头。

【秋宿慈恩寺遂上人院】

满阁终南色，清宵独倚栏。风高斜汉动，叶下曲江寒。帝里求名老，空门见性难。吾师无一事，不似在长安。

【题栖霞寺庆上人院】

居与鸟巢邻，日将巢鸟亲。多生从此性，久集得无身。树老风终夜，山寒雪见春。不知诸祖后，传印自何人（二联同后《赠立规上人》诗。又同后《题栖云寺立上人院》诗）。

【送友人之蜀】

天际蜀门开，西看举别杯。何人不异礼，上客自怀才。夜涧青林发，秋江绿水来。临邛行乐处，莫到白头回。

【赠同官苏明府】

山中畿内邑，别觉大夫清。簿领分王事，官资寄野情。闲斋无狱讼，隐几向泉声。从此朝天路，门前是去程。

【送厉圖南往荊州謁伯】

云水入荊湘，古来鱼鸟乡。故關重隔遠，春日独行长。山溜含清瀨，江雷

吐夜光。郡中词客会，游子更升堂。

【山中夜坐】

归家来几夜，倏忽隔秋残。月满方塘白，风依老树寒。戏鱼重跃定，惊鸟却栖难。为有门前路，吾生不得安。

【送台州唐兴陈明府】

见说海西隅，山川与俗殊。宦游如不到，仙分即应无。瀑布当公署，天台是县图。遥知为吏去，有术字惺孤。

【夏日过友人檀溪别业】

暑天宜野宅，林籁爽泠泠。沙月邀开户，岩风助扫庭。鹭栖依绿筱，鱼跃出清萍。客抱方如醉，因来得暂醒。

【自江上入关】

尽室寄沧洲，孤帆独泝流。天涯心似梦，江上雨兼秋。文字为人弃，田园被债收。此名如不得，何处拟将休。

【冬夜和范秘书宿秘省中作】

每入得闲吟，清曹阙下深。因知遥夜坐，别有远山心。芸细书中气，松疎雪后阴。归时高兴足，还复插朝簪。

【送友人游太原】

孤帆几日悬，楚客思飘然。水宿南湖夜，山离旧国年。秋风高送鴈，寒雨入停蝉。此去勤书札，时常中路传。

【江上寄山客】

山后与山前，相思隔叫猿。残云收树末，反照落江源。苦雨秋涛长，狂风野火翻。朝来卖药客，遇我达君言。

【送张郎中赴睦州】

青山复绿水，想入富春西。夹岸清猿去，中流白日低。美兼华省出，荣共故乡齐。贱子遥攀送，归心逐马啼。

【送鄂渚韦尚书赴镇】

夏口本吴头，重城据上游。戈船转江汉，风月宿汀洲。执宪倾民望，衔思赴主忧。谁知旧寮属，攀饯泪仍流。

【送崔侍御书记赴山北座主尚书招辟】

书记向邱门，旌幢夹谷尊。从来游幕意，此去并酬恩。鴈叫嫌冰合，骢嘶喜雪繁。同为入室士，不觉别销魂。

【入朝遇雪】

霜鬓持霜简，朝天向雪天。玉阶初辨色，琼树乍相鲜。密翳空难曙，盈征瑞不愆。谁为洛阳客，是日更高眠。

【勉力】

日月不并照，升沈俱有时。自谋徒欲速，孤立却宜迟。尽力唯求己，公心任遇谁。人间不得意，半是鬓先衰。

【郊居寄友人】

林色树还曛，何时得见君。独居度永日，相去远浮云。故疾随秋至，离怀觉夜分。蛩声非自苦，偏是旅人闻。

【送陆肱归吴兴】

雪后江上去，风光故国新。清浑天气晓，绿动浪花春。劝酒提壶鸟，乘舟震泽人。谁知沧海月，取桂却来秦。

【暮秋重过山僧院】

却接良宵坐，明河几转流。安禅逢小暑，抱疾入高秋（二联同后《秋夜宿重本上人院》诗）。静室闻玄理，深山可白头。朝朝献林果，亦欲学猕猴。

【送新安少府】

南浮虽六月，风水已秋凉。日乱看江树，身飞逐楚樯。后期谁可定，临别语空长。远宦须清苦，幽兰贵独芳。

【送人归吴】

何人不归去，君去是闲人。帝里求相识，山家即近邻。交情吾道可，离思柳条新。未饮青门酒，先如醉梦身。

【送姚评事】

儒服従戎去，须知胜事全。使君开幕日，天子偃戈年。风雨依嵩岭，桑麻接楚田（次句同前《送姚郃先辈赴汝州辟》）。新诗随过客，旋满洛阳传。

【题栖霞寺立上人院】

是法従生有，修持历劫尘。独居岩下室，长似定中身。树老风终夜，山寒雪见春。不知诸祖后，传印自何人（三四联同前《题栖霞寺庆上人院》诗）。

【黔中罢职过峡州题田使君北楼】

巴中初去日，已遇使君留。及得寻东道，还陪上北楼。江冲巫峡出，樯过洛宫收。好是従戎罢，看山觉自由。

【江上送従兄羣玉校书东游】

逍遥蓬阁吏，才子复诗流。坟籍因穷览，江湖却縦游。眠波听戍鼓，饭浦约渔舟。处处迎高密，先应扫郡楼。

【宛陵东峯亭与友人话别】

坐举天涯目，停杯语日晡。修篁齐迥檻，列岫限平芜。乱水通三楚，归帆挂五湖。不知从此去，何处是前途。

【华山寻隠者】

自入华山居，關东相见疎。瓢中谁寄酒，叶上我留书。巢鸟寒栖尽，潭泉暮冻余。长闻得药力，此说又何如（末聯同后《寻华阳隱者》）。

【题荐福寺僧栖白上人院】

空门有才子，得道亦吟诗。内殿频征入，孤峯久作期。高名何代比，密行几生持。长爱乔松院，清凉坐夏时。

【游四明山刘樊二真人祠题山下孙氏居】

久在仙坛下，全家是地仙。池塘来乳洞，禾黍接芝田。起看青山足，还倾白酒眠。不知尘世事，双鬓逐流年。

【和太学赵鸿博士归蔡中】

得禄従高第，还乡见后生。田园休问主，词赋已垂名。扫壁前题出，开窓旧景清。遥知贤太守，致席日邀迎。

【送寿昌曹明府】

惠人须宰邑，为政贵通经。却用清琴理，犹嫌薄俗听。涨江时渐绿，春峤晓还青。若宿严陵濑，谁当是客星。

【哭贾岛】

秦楼吟苦夜，南望只悲君。一宦终遐徼，千山隔旅坟。恨声流蜀魄，冤气入湘云。无限风骚句，时来日夜闻。

【送薛能赴镇徐方】

列土人间盛，彭门属九州。山河天设险，礼乐牧分忧。皎日为明信，清风占早秋。虽同却縠举，却縠不封侯。

【送凤翔范书记】

西京无暑气，夏景似清秋。天府来相辟，高人去自由。江山通蜀国，日月近神州。若共将军语，河兰地未收。

【岐山逢陝下故人】

三秦一会面，二陝两分携。共忆黄河北，相留白日西。寄来书少达，别后梦多迷。早晚期于此，看花听鸟啼。

【送友人陆肱往太原】

并州非故国，君去复寻谁。獫狁方为寇，嫫姚正用师。戍烟来有号，边雪下无时。更想经绵上，应逢禁火期。

【赠李将军】

吾宗偏好武，汉代将家流。走马辞中禁，屯军向渭州。天心待破虏，阵面许封侯。却得河源水，方应洗国讎。

【送友人喻坦之任睦州】

归心常共知，归路不相随。彼此无依倚，东西又别离。山花含雨湿，江树

逆潮欹。莫恋渔樵兴，生涯各有期。

【寻华阳隱者】

闲却白云居，行踪出去初。窓中聊取笔，架上独留书。日背林光冷，潭澄岳影虚。长闻得药力，此说复何如（末聯同前华山寻隱者）。

【长安即事】

岂得有书名，徒为老帝京。關中秋气早，雨后夜凉生。沧海身终泛，青门梦已行。秦人縱相识，多少别离情。

【送友人游塞北】

朔野正秋风，前程见碛鸿（一作【上马问云中，长川送北风】）。日西身独遠，山转路无穷。树隔高關断，沙连大漠空。君看河外将，早晚拟（一作合）平戎。

【陝府上姚中丞】

關东领藩镇，阙下授旌旄。觅句秋吟苦，酬恩夜坐劳。天开吹角出，木落上楼高。闲话钱塘郡，半年（一作生）听海涛。

【送供奉喻炼师归天目山】

承恩虽内殿，得道本深山。举世相看老，孤峯独自还。溪来青壁里，路在白云间。絕顶无人住，双峯是旧關。

【之任建安綠溪亭偶作 二首】

入境当春务，农蚕事正殷。逢溪难饮马，度岭更劳人。想取烝黎泰，无过赋斂均。不知成政后，谁是得为邻。

维舟綠溪岸，遶郡白云峯。将幕连山起，人家向水重。短才无独见，长策未相逢。所幸分尧理，蒸民悉可封。

【送侯郎中任新定 二首】

为郎非白头，作牧授沧洲。江界乘潮入，山川值胜游。暑风随转扇，凉月傍开楼。便欲归田里，抛官逐隱侯。

罢郎东出守，半路得浮舟。大旆行当夏，桐江到未秋。云闲分岛寺，涛静见沙鸥。谁伴临清景，吟诗上郡楼。

【送太学吴康仁及第南归】

因为太学选，志业彻春闱。首领诸生出，先登上第归。一荣犹未已，具庆且应稀。縱马行青草，临歧脱白衣。家遥楚国寄，帆对汉山飞。知己盈华省，看君再发机。

【陝州题河上亭】

岸拥洪流急，亭开清兴长。当轩河草晚，入坐水风凉。独鸟惊来客，孤云触去樯。秋声和遠雨，暮色带微阳。浪静澄窓影，沙明发簟光。逍遥每尽日

，谁识爱沧浪。

【留题姚氏山斋】

未厌栖林趣，犹怀济世才。闲眠知道在，高步会时来。露滴徒添砚，蝉吟便送杯。乱书离缥帙，迸笋出莓苔。异果因僧摘，幽窓为燕开。春游何处尽，欲别几迟回。

【长安书怀投知己（一作投邢员外）】

所学近雕虫，知难谒至公。徒随众人后，拟老一生中。间岁家书到，经荒世业空。心悬沧海断（一作口），梦与白云通。玉漏声连北，银河气极东。闾门迢递月，禁苑寂寥鸿。地广身难束（一作局），时平道独穷。萧条苔长雨，淅沥叶危风。久恋（一作愧）干朝客，多惭别钓翁。因依非不忝，延荐况曾蒙。与善应（一作如）无替，垂恩本有终。霜天摇落日，莫使逐孤（一作飘）蓬。

【送姚侍御充渭北掌书记】

北境烽烟急，南山战伐频。抚绥初易帅，参画尽须人。书记才偏称，朝廷意更亲。绣衣行李日，绮陌别离尘。报国将临虏，之藩不离秦。豸冠严在首，雄笔健随身。饮马河声暮，休兵塞色春。败亡仍暴骨，冤哭可伤神。上策何当用，边情此是真。雕阴曾久客，拜送欲沾巾。

【长安书情投知己】

陝服因诗句，从容已半年。一从归阙下，罕得到门前。每候朝轩出，常看列宿悬。重投期见奖，数首果蒙传。转觉功宜倍，兼令住更坚。都忘春暂醉，少省夜曾眠。烦暑灯谁读，孤寒业自专。精华搜未竭，骚雅琢须全。此事勤虽过，他谋拙莫先。槐街劳白日，桂路在青天。取第殊无序，还乡可有缘。旅情长越鸟，秋思几秦蝉。月色千楼满，砧声万井连。江山阻迢递，时节暗推迁。道即穷通守，才应始末怜。书绅相戒语，藏篋赠行篇。致主当齐圣，为郎本是仙。人心期际会，凤翼语迁延。毕竟良图在，何妨逸性便。幽斋中寝觉，珍木正阴圆。隐几门瞻彼，临云兴渺然。五陵供丽景，六义动花笺。傥与潜生翼，宁非助化权。免教垂素发，归种海隅田。

【府试丹浦非乐战】

自古为君道，垂衣致理难。怀仁须去杀，用武即胜残。毒炽诛方及，兵临衅可观。居来彭蠡固，战罢洞庭宽。雪国知天远，霜林是血丹。吾皇则尧典，薄伐至桑干。

【府试风雨闻鸡】

不为风雨变，鸡德一何贞。在暗长先觉，临晨即自鸣。阴霾方见信，顷刻讵移声。向晦如相警，知时似独清。萧萧和断漏，喔喔报重城。欲识诗人兴

，中含君子情。

【府试观兰亭圖】

往会人何处，遗踪事可观。林亭今日在，草木古春残。笔想吟中驻，杯疑饮后干。向青穿峻岭，当白认回湍。月影窈间夜，湖光枕上寒。不知诗酒客，谁更慕前欢。

【府试老人星见】

良宵出户庭，极目向青冥。海内逢康日，天边见寿星。临空遥的的，竟晓独荧荧。春后先依丙，秋来忽近丁。垂休临有道，作瑞掩前经。岂比周王梦，徒言得九龄。

【省试振鹭】

有鸟生江浦，霜华作羽翰。君臣将比洁，朝野共相欢。月影林梢下，冰光水际残。翻飞时共乐，饮分道皆安。迴翥宜高咏，羣栖入静看。由来鸳鹭侣，济济列千官。

【寄辛明府】

何处无苛政，东南有子男。细将朝客说，须是邑人谗。别业空经稔，归田独未甘。目凝烟积树，心贮月明潭。晓鼓愁方乱，春山睡正酣。不任啼鸟思，乡社欲桑蚕。

【苑中题友人林亭】

井邑藏岳穴，幽栖趣若何。春篁抽笋密，夏鸟杂雏多。坐有清风至，林无暑气过。乱书还就叶，真饮不听歌。片影明红藓，新阴映绿萝。雄文终可惜，莫更弃高科。

【投京兆府试官任文学先辈】

高兴每论诗，非才独见推。应当明试日，不比暗投时。出口人皆信，操心自可知。孤单虽有托，际会别无期。取舍知由己，穷通断在兹。贱身何足数，公道自难欺。泽国违甘旨，渔舟积梦思。长安未归去，为倚鉴妍媸。

【宋少府东溪泛舟】

登岸还入舟，水禽惊笑语。晚叶低众色，湿云带繁暑。落日乘醉归，溪流复几许。

【闻北虏入灵州 二首】

河水一夜合，虏骑入（一作满）灵州。岁岁征兵去，难防塞草秋。
见说灵州战，沙中血未干。将军日告急，走马向长安。

【送友人下第归感懷】

帝里春无意，归山对物华。即应来日去，九陌踏槐花。

【赠桂林友人】

君家桂林住，日伐桂枝炊。何事东堂树，年年待一枝。

【长安感怀】

一第知何日，全家待此身。空将灞陵酒，酌送向东人。

【题长孙桐树】

一去龙门侧，千年凤影移。空余翦圭处，无复在孙枝。

【渡汉江】

岭外音书绝，经年复历春。近乡情更怯，不敢问来人。

【嵩山夜还】

家住东皋下，好采旧山薇。自省游泉石，何曾不夜归。

【暮秋宿清源上人院】

野客愁来日，山房木落中。微风生夜半，积雨向秋终。证道方离法，安禅不住空。迷途将觉路，语默见西东。

【秋夜宿重本上人院】

却忆凉堂坐，明河几度流。安禅逢小暑，抱疾入高秋。水国曾重讲，云林半旧游。此来看月落，还似道相求（第二联同前《暮秋重过山僧院》诗）。

【赠立规上人】

竹向空斋合，无僧在四邻。去云离坐石，斜月到禅身。树老风终夜，山寒雪见春。不知诸祖后，传印是何人（二联同前《栖霞寺庆上人院》诗）。

【苏州寒食日送人归觐】

江城寒食下，花木惨离魂。几宿投山寺，孤帆过海门。（缺）声泼火雨，柳色禁烟村。定看高堂后，斑衣灭泪痕。

【即席送许（缺）之曹南省兄】

梅烂荷圆六月天，归帆高背虎邱烟。到时自见成行雁，别处休听满树蝉。卖剑为除吴市酒，携家犹借洞庭船。待看春榜来江外，名占蓬莱第几仙。

【送罗著作两浙按狱（著作，常宰苏州吴县）】

使印星车适旧游，陶潜今日在瀛洲。科条尽晓三千罪，囹圄应空十二州。旧绶有香笼驿马，皇华无暇狎沙鸥。归来重过姑苏郡，莫忘题名在虎邱。

【下第后屏居书怀寄张侍御】

别足岂一生，良工隔千里。故山彭泽上，归梦向汾水。低催神气尽，僮仆心亦耻。未达谁不知，达者多忘此。行年忽已壮，去老年更几。功名如不彰，身歿岂为鬼。纔看芳草歇，即叹凉风起。骢马未来朝，嘶声尚在耳。

【答韩中丞容不饮酒】

老大成名仍足病，强听丝竹亦无欢。高情太守容闲坐，借与青山尽日看。

【句】

只将五字句，用破一生心。（北梦琐言）

楚泽八千里，盘盘此都会。巍峩数里城，逵水相暎带。（方輿胜览）